

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Te faaroo nei matou i te mau parau i heheuhia mai e te Atua i mutaa'ihora, e te mau parau ta'na e heheu mai i teie nei, e te faaroo nei hoi matou e, e riro â oia i te heheu mai i te hoê atu â mau parau maitai e te faufaa rahi i to'na ra basileia.”

Nu. 12.

Setepa, 1912.

Mat. 5.

Te Rima o te Atua.

“E ua hi'o atura vau i te Varua o te Atua i te taeraa mai i nia i te tahi atu â mau taata o te Etene, e ua haere atura ratou mai roto atu i te tîtiraa, na nia i te moana rahi ra.” Buka a Moromona; 1 Nephi 13: 13.

I TE fenua Beritane, i te hau o te Arii Iakobo I, te parahi ra i te tahi mau taata parau-tia i te oire nainai, parauhia Scrooby. E arii etaeta roa o Iakobo I, e ua hinaaro oia ia faariro i to'na mau taata ei Porotesani mai ia'na te huru. Aita râ teie nei mau taata i hinaaro i te reira, e no reira ua tuu mai taua arii ra i te hamani-ino-rahi i nia iho ia ratou ra.

Ua faatupu huna ratou i ta ratou mau haamoriraa ra i roto i te fare o te hoê taata, o Brewster to'na i'oa ra. E ua maitihia e ratou te hoê taata maitai, o Robinson te i'oa ei orometua na ratou. Maoro iti a'era, ua ite te arii i ta ratou mau ohipa, e ua riri ihora oia ia ratou.

Ua mâta'u ratou ia'na, no reira, ua opua ratou e, e haere ana'e ratou i te fenua o Holland, e parahi ai. Ua faatomo ratou i te hoê pahi i ta ratou mau tao'a, e ua fatata ratou ia fano atura, ei reira ua tae maira te mau faehau o

taua arii ra, e ua tiahi ia ratou i uta, e ua haru ratou i te tahi pae, e ua tapeahia ra ratou i te tahi na hebedoma i roto i te fare tapearaa.

E na avae i muri mai, ua tamata faahou ratou ia fano atu ia Holland, e ua manuïa hoi te tahi pae, te toea râ, ua haru-faahou-hia ra, e ua tapea-faahou-hia ra ratou i roto i te fare tapearaa. Roroa iti a'era ua faatiamâhia ratou, e ua haere maite atu ratou i to ratou mau hoa, tei te fenua ra o Holland.

E feia itoito roa ratou, e ua roaa mai ia ratou te roo maitai no ta ratou haavare ore e to ratou aravihi. Parahi ihora ratou i taua fenua ra i na matahiti 11. Aita râ ratou i mauruuru i taua vahi ra no te mau peu ta ratou i rave. No reira ua opua ratou e haere atu i te fenua apî ta Columbus i itea a'enei. Ua haapue ratou i to ratou mau faufaa, e ua hoo ratou i na pahi e piti. Teie hoi te na i'oa o taua na pahi ra, oia hoi, te "Speedwell", e te "Mayflower". Area râ, e pahi huru pê te "Speedwell", no reira ua faarue ratou ia'na.

Aita i navai ta ratou mau faufaa ia haere paatoa i te haerea hoê, no reira ua maiti ratou e hoê hanere taata huru apî ia haere. E ua maiti atoa hoi ratou i te hoê taata, o Brewster to'na i'oa, ei aratai na ratou. E ia ineine ratou, haapae ihora ratou i te maa, e ua na ô atura ratou e, ia titau tatou i te Atua, i te ravea maitai na tatou, e na ta tatou mau tamarii.

I te avae Tiurai, i te matahiti 1620, ua tairuru ratou i tahatai, e ua pure atu ratou i te Atua, mai te ani atu ia'na e, ia tia maite Oia ia ratou i to ratou tereraa'tu i te fenua apî, oia hoi i Amerika. Oti a'era ta ratou pureraa ra, haere atura ratou na nia te pahi, ei reira, fano atura ratou i te fenua Beritani. Ua tapae atura ratou i na oire i reira. E i te avae Setepa, faarue ihora ratou i Beritani. Ua tere noa ratou e 65 mahana, e i te 22 no Ditema, tapae atura ratou i Amerika, e ua tutau ratou i te ava parauhia ra, Cape

Cod. Ua tae ratou i reira i te tau toetoe, e ua roohia te tahi pae e te ma'i; pohe roa e 50 taata.

Ua itoito roa te toea, e iata e i te tau mahanahana, ua tanu ratou i te mau huero ta ratou i hopoi maira. Ua faatia atoa ratou i te hoê oire nainai i reira. Maoro iti a'era ua tae maira te tahi atu mau pahi, e ua amui maira te mau taata e rave rahi ia ratou. E epiti ahuru ma toru matahiti i muri mai i te tapaeraa matamua, te parahi ra e 24,000 taata i Amerika. No reira ua ite papu roa tatou e, ua tupu roa te orama ta Nephi i ite.—MORONI POUTERA.



O MAPUSAGA.

Te fenua haapura teie na te Ekalesia i Hamoa. I te tahi mau matahiti a'enei e medebara mau taua fenua ra, i teie nei râ, no te itoito o to tatou mau orometua e te Feia Mo'a i reira, ua riro ei fenua nehenehe hau ê, e te ruperupe. Tei uta roa taua fenua ra, e e riro paha e toru maile te atea i uta. Tei reira te hoê haapiiraa maitai roa.

Te Parau Tuatapapa no
Iosepha Semita.

(TUATIRAA.)

PENE XXIV.

MATAHITI 1836.

Te Feia Mo'a i te mataeinaa ra, i Cale. Ua anihia ratou e te mau taata no Cale ia faarue ê atu i taua mataeinaara. Ua faatiahia te mataeinaa ra o Calavela. Amui maira o Ioane Tela, o Lorenezo Seno, e o Viriadi Ritedi i te Ekalesia.

A HARURU noa'i te mata'i toetoe rahi u'ana, i te avae Novema, i te matahiti 1833, te faarue ê atura e hoê ahuru ma piti hanere Feia Mo'a, o tei hamani-ino-hia, i te rehu auahi no to ratou mau fare i Missouri, e te haere atura ratou na te hiti no te anavai ra, no Missouri. Ua haere atu ratou i tera pae mai no te anavai, mai te afai atu i ta ratou mau mea faufaa, ta ratou i mau, a tiahihia'i ratou e te enemî, e ua tuu ia ratou iho ia faahereherehia e te feia i reira. Tipae atura ratou i te mataeinaa ra, i Cale, e ua hi'o aroha mai te mau taata ia ratou—e mea ê te reira no te mau taata i tera pae no Missouri.

Ua poihere puai mai to Cale i te mau taeae, e te mau tuahine i roto i teie nei tau toetoe, e faatia maira ratou ia parahi ratou i roto i to ratou ra mau fare. Ua parahi tamau atura te Feia Mo'a i reira i na matahiti e toru, mai te tia i te taime e tia ia ratou ia ho'i faahou atu i te mataeinaa ra, i Iaketoni. Ua tamata noa ratou, na roto i te ture no te fenua, e ani atura ratou i te peresideni no te hau Amerika ia tauturu mai ia ratou, ia noaa ia ratou to ratou ihora mau fare, aita râ ratou i manuia. Ua paruparu roa te tavana ra, o Dunklin, mai i te hoê tamarî i te huru, e te tupu noa ra te peapea. Ua mana'o ihora to Cale e, eita e tia i te Feia Mo'a, ia ho'i faahou atu i Iaketoni, e mai te mea eita ratou

e haere vave atu i te tahi mataeinaa ê, e tupu paha te tama'i i reira. I roto i taua anotau ra, e mea ino roa te peapea i ropu i te mau taata, o tei mau i te tîti, e te mau taata i ore ai i mau. Aita roa te Feia Mo'a i mau i te tîti, e e rave rahi tei tae mai i Misouri, e ua feii roa to Misouri i te mau taata êê. Aita roa'tu te Feia Mo'a i hinaaro i te tama'i, area mai te mea e tae mai te enemi, e paruru atu ratou i to ratou mau utuafare ia tae noa'tu i te poheraa.

I te mahana 29 no Tiunu, 1836, ua haapaohia te hoê pureraa e te mau taata no Cale, e ua papaihia te tahi parau, i te aniraa mai i te Feia Mo'a ia faarue ê atu i taua mataeinaa ra. Ua ani mārû mai ratou i te Feia Mo'a, mai te a'o mai ia ratou ia haere i te tahi vahi ê, ia tiaî râ ratou ia hoo-hia'tu to ratou mau fenua. Ua tauturu mai ratou i te Feia Mo'a i te imi i te hoê vahi ê, e ua faataahia te tahi mau taata, ei tomite, ia noaa i te tahi moni ia tauturu mai i te feia vêvê, e parau maira ratou e, e tamata noa ratou i te faaore i te hamani-ino-raa no te enemi.

Ua afai mai te tahi mau taata paari i teie parau aniraa i te Feia Mo'a, e e piti mahana i muri iho, haaputuputu atura te mau Peresibutero ia feruri i nia iho. Ua parau atura ratou e, e faarue ê atu ratou i taua mataeinaa ra, area râ, e feia hara ore ratou. Ua faaite atu te Feia Mo'a i to ratou mauruuru rahi i to Cale, no to ratou aroha e te tauturu, e parau atura ratou i to Cale e, e riro teie nei faarueraa ei fafau no te hau, i ropu i te na feia e piti, e a muri noa'tu. Ua hi'o aroha mai te mau taata no Cale i te Feia Mo'a, mai te feia Cherisetiano mau i te huru, area te faarue ê atura te Feia Mo'a i to ratou mau fare, e haere atura i roto i te hoê medebara ano roa ia haapê i taua aroha ra.

Ua haponohia te parau i te Peropheta, i Ketelani, e papai maira ona, e ta'na na tauturu i te tahi mau leta na te Feia Mo'a, e na te mau taata no Cale atoa hoi. A'o maira oia i te mau taeae ia hoo atu i to ratou fenua i te maa moni iti roa, e paruru puai atu i to ratou mau utuafare, e haapao

i te ture no te fenua, Tei roto i te leta na te mau taata no Cale, te tahi parau paruru i te Feia Mo'a no Missouri. Aita e parau faahapa i roto, area ua i roa i te parau aroha, e te mihi no te faarneraa o te Feia Mo'a i to ratou mau fare, no te mau parau haavare e te hamani-ino-raa a to ratou mau enemî.

I mua'e i na avae e toru i muri mai i ta ratou parau-raa'tu e, e faarue atu ratou i taua mataeinaa ra, mai tei au i te hinaaro no te mau taata i reira, te haere e atura te Feia Mo'a, e ua iteahia te hoê vahi i te pae apatoerau no te mataeinaa ra, no Rê, e faaea ihora ratou i reira. Te parahi ra e hitu taata i reira, o tei haapue i te meli no te mau debure oviri, hinaaro ihora râ ratou i te hoo mai i to ratou fenua, no te mea ua pau roa'e te meli. Ua faaea ratou i pihaiiho i te ooa ra, i Shoal, e aita roa te reira e fenua maitai rahi, e te nehenehe, area ua ite te Feia Mo'a e, e faarirohia ia e fenua maitai rahi, na roto i to ratou ohipa, e te haamaitairaa na te Atua.

Ia tae i te avae Ditema, e rave rahi te mau taata o tei tae mai i reira, e ani atura ratou i te hau Amerika ia faataa i te reira fenua, ei mataeinaa e, e ua na reirahia'i, e ua mairihia te io'a ra, o Calavela, i nia iho. Ia tae i te avae Eperera, 1837, ua maitihia, e ua faitohia te hoê vahi ia patuhia te oire, Fa Wese, e te hoohia'tura te mau tufaa fenua nainai i te mau taata. I te avae Tiurai, ua faaineinehia te fenua ia patuhia te hiero, aita râ i faaotihia te reira, no te mea aita te parau-tia no to Missouri i au i te tahi hiero i taua taime ra, area eita e maoro e patuhia te fare rahi no te Atua i reira. I te avae Novema, ua faarahihia Fa Wese, ia faito i na maile orapa e piti, e i teie nei taime, e rave rahi te mau taata o tei tae mai i reira, e haamata i te faaapû i te fenua.

A riro ai te Feia Mo'a i Missouri ei hi'oraa na to te ao atoa nei, i te itoitoe, e te mâta'u ore, te tupu noa ra te ohipa maitai i Ketelani. Aita roa te hoê matahiti i hau i te oaoa e te maitai i te matahiti 1836. Ua haamaitahia te hiero; ua faatahinuhia te mau Peresibutero, e tonohia ihora e poro-

haere i te Evanelia; haere atura Iosepha i nia i te hoê tere manuïa maitai i te pae i te hitia o râ, e e rave rahi te mau taata, o tei amui vave mai i te Ekalesia. Tei rotopu i te mau taata, tei amui mai i te Ekalesia, o Ioane Tela, o Lorenezo Seno, e o Viriadi Ritedi.

Ua farii Ioane Tela i te parau mau, na roto i te ohipa no Pare P. Paraiti, o tei tonohia'tu i te fenua ra, i Toronato, i Canada. I mua'e i te haamataraa i te ohipa no te Fatu i Canada, ua faaîhia o Hebera C. Kimebera i te varua no te tohu, e haere atura ona i te fare no Pare P. Paraiti i te hoê pô, e faaara'tura ia'na, e tohu ihora ona i te ohipa manuïa e ravehia e Pare. Ua parau atoa'tura oia ia'na e, mai te mea e haapao maitai ona, e faaorahia ta'na vahine, e e fanau mai oia i te hoê tamaiti, e ua tupu mau roa te reira. Ua riro Ioane Tela ei orometua i roto i te hoê haapaoraa Porosetani, i parauhia Metodi, e faaea ihora oia i te a'o atu i te parau no to'na iho faaroo, ia riro oia ei melo ana'e i roto i te Ekalesia mau. I muri mai i te hoê hi'opoaraa maitai i te Evanelia, ua bapetizohia ona, e aita roa ona i feaa i te hoê taima. Ua fanau mai Ioane Tela i te mahana 1 no Novema, 1808, i te oire Milinatorape, i Beritane. Ua oti oia i te haere i te haapiiraa paari, i te hoê ahuru ma hitu o to'na ra matahiti, e riro ihora oia ei orometua. Ua haere atu ona i Amerika i te piti ahuru ma maha o to'na ra matahiti, e parahi atura i te fenua ra, i Canada, e i reira ua faaroo ona, e farii i te Evanelia.

Ua fanau mai o Lorenezo Seno i te mahana 3 no Eperera, 1814, i Manatua, i te mataeinaa ra, i Porotage, i Ohio. A haere atu ai ona i te haapiiraa paari, i parauhia Oberina, ua putâpu to'na aaui te faaroo i te parau no te Evanelia. Farerei ihora ona ia Davida W. Patena, e no ta raua paraparauraa, ua tupu to'na i te ohipa, e te mau mea nehenehe no te Atua. Ia oti Lorenezo i te haere i teie nei haapiiraa rahi, mai tei au i te a'oraa mai o Eliza R. Seno, te hoê vahine o tei amui mai i te Ekalesia, haere atura oia i Ketelani e haa-

pîi i te re'o Hebera. I muri iti a'e, ua papu roa ia'na te parau mau no te Evanelia, e amui maira oia i te Ekalesia. Ua baptizohia ona e Ioane F. Boanotona, i te avae Tiunu, 1836, e i muri mai, ua faatoroahia ei Peresibutero, ei reira ua haamata mau oia i to'na raveraa i te ohipa no te Fatu.

Ua baptizohia o Viriadi Ritedi i te mahana hopea no te matahiti 1836, e ua riro ona ei Aposetolo, e te tauturu piti ia Birikama Youne. Ua haere atu o Hebera C. Kimebela, e te tahi atu mau taeae, i te hoê ahiahi, e tapu i te hoê apoo i roto i te pape paari, e na Birikama Youne i baptizo atu ia'na. Ua faaroo o Viriadi i te parau no te Evanelia, ia rave ona i te hoê Buka a Moromona, e iriti taue atu i te reira. Aita i oti ia'na te taio i te hoê apî, a parau atu ai ona e, "Na te Atua, e aore râ te diablo, i tauturu mai i te papai i teie nei buka, no te mea, aita roa'tu te reira i papahia e te taata nei." Ua taio ona i taua buka ra i na taime e piti, i roto i na matahiti e hoê ahuru, e ia hoo atura oia i ta'na raau, e faaoti i to'na ohipa, tere atura oia e hitu hanere maile i Ketelani e haapii maitai i te Evanelia, e ua ite vave oia e, o te parau mau roa ia te reira. O te tau toetoe roa te reira, area râ ani atura oia ia baptizohia. E na reira noa i iteahia'i te mau amaa parau-tia, e ia poihia i te raau rahi, aita i maoro, faahotu maira ratou i te auhune faufaa rahi.

—OLE PETESONA.

(E tuatihia mai teie parau.)

Parau Faaite.

I roto i te vea no teie nei mau avae, ua neineihia te hoê ia mau parau aro, oia hoi te tatararaa o te hoê mau parau hohonu roa. Te neneihia nei i roto i te tahi mau vea te mau tatararaa parau aro mai te faahapa mai i ta matou tatararaa, e no reira te faaite nei matou i ta matou haapiiraa i te reira mau vahi. Teie nei mau tatararaa, ua noaa ia na roto i te feruri, e te imi o te feia paari, e te farii noa nei matou i te reira; eiaha ma te mana'o e, tirara'tu ai. Teie ta matou e a'o atu i te mau taata'toa, oia hoi, te mau parau aro, o te ore e noaa te ite, eita e tia ia tatou ia feruri i te reira. Tera te mea tia mau ia imihia, te mau parau papu e te fifi ore.

*Te Puaa e Mitu Afii.**Na te mau hoa no Te Heheuraa Apî. Ia ora na.*

I PARAHĪ noa vau, mai te haamaitai i te Fatu, e mai te hi'ō i te haerea o te Ekalesia. I tae mai ai ia'u nei, e tahi tau api, no te vea Katorika. Tei mana'ohia e, te vea no Tiunu, M. 1911. Tei roto i taua na api ra, te parau no te puaa e hitu afii, auahuru hoi tara, Apo. 13: 1, tei papaihia e Paretahito-perepitero. Ei faaiteraa i to'na ra mau hoa Kiritiano i te auraa o te puaa e hitu afii, auahuru hoi tara ra. E ua na ô atu oia e, ua ite te mau orometua no te mau haapaoraa êê, te Porotesani, te Momoni, te Petania e te Tanito, taua puaa e hitu ra, o te anete-Kirito ia.

I mana'o ai au e, e faaite atu ia outou, i ta matou i ite, e ta matou e haapii nei. Te vai atoa ra te tahi vahi haamaramarama-ore-hia e a'na, oia hoi te nemera o te puaa, e 666, aita oia i faataa e, no te puaa taua nemera ra, no te mea i roto i te pene 13 nei, e piti puaa i faaitehia. Mai te irava 1, e tae noa'tu i te irava 10, e puaa ê ia. Mai te irava 11 e tae, noa'tu i te irava 17, e puaa ê ia. I roto râ i ta'na faaiteraa, mai te mea ra ia e, ua afaihia te nemera e 666 no te puaa e hitu afii. No taua faaiteraa ra i fifi ai te mana'o o te tahi mau taata.

No taua na vahi ra, i mana'o ai au e, e faaite atu ia outou na. "Te puaa e hitu afii" Apo. 13:1. "Tia ihora vau i nia i te one tahatai, e hi'ō atura vau i te hoê puaa i te a'e-raa'e i nia, mai raro mai i te moana ra. E hitu o'na afii, auahuru tara; auahuru hoi korona i nia iho i taua mau tara no'na ra. E i'oa faaino ana'e tei papaihia i nia i to'na ra mau afii. E taua puaa ta'u i ite ra, mai te nemera ia to'na huru, e mai to te daba to'na avae, e to'na vaha, mai te vaha ia o te liona, e ua horoa mai te teni i to'na iho puai, e te mana rahi no'na."

Eaha ia taua puaa e hitu afii nei, o te anete-Kirito anei? O te hau Roma anei? E hoa inoma e, o te hau Roma ia.

E na hea to tatou ite i te reira, e papu ai. E na roto ia i te taoto a Nebukaneza, ua ite oia i te hoê tii. Te upoo o taua tii ra, e auro ia. Te ouma e na rima ra, e ario ia. Te opu e na humaha ra, e veo ia. Na avae ra, e auri ia; na mani-mani avae ra, e auri te tahi pae, e araea te tahi pae.

Te faaite ra Daniela e, e parau ia no te mau hau rarahi o te fenua nei; o te mono maite te tahi i te tahi. Te piti o te hi'oraa, e hi'o ia i te orama o na mea ra rarahi e maha. Daniela pene 7. Tei te matamua ra, mai te liona ia; e te piti ra, mai te daba ia; te toru ra, mai te nemera ia; e te maha ra, e puaa mehamaha ia, hoê ahuru o'na tara.

Ua faaite mai te melahi ia Daniela e, e parau ia no te mau hau rarahi, o te mono maite te tahi i te tahi.

Te toru o te hi'oraa, e hi'o ia i te orama o te puaa e hitu afii; auahuru tara. Apo. pene 13:1. Taua puaa ta'u i ite ra, mai te nemera ia to'na huru; e to'na avae mai to te daba ia; e to'na vaha mai te vaha ia o te liona. E tei nia iho i taua puaa hoê nei na tara hoê ahuru ra. Te huru o na mea ra e maha i iteahia e Daniela ra, te itea-atoa-hia nei ia e Ioane i nia iho i taua puaa e hitu afii nei. Na te reira i faaite haamaramarama ia tatou e, te tahoê nei te auraa o taua na tohuraa nei. E fîfi rii paha to outou mana'o i te mea i tahoêhia'i na huru e toru i nia i te puaa hoê nei.

I te tau i ite ai Ioane i teie nei orama, tei ia Roma ia te mana. Na'na'tura ia e faatere i nia iho i na hau e toru i mutaa ihora, ua horomiihia ratou i roto ia Roma. No reira i tahoêhia mai ai na huru e toru i nia iho taua puaa hoê nei.

Ua faaite mai te melahi ia Ioane i te auraa o na afii e hitu, e na tara hoê ahuru ra. Apo. 17:9, 10, 12. O na afii e hitu ra, o na mou'a ia e hitu, o na arii toohitu ra hoi ratou. Na tara auahuru ra, o na arii ia tino ahuru. No reira papu roa'tura ia to tatou mana'o i te hi'oraa'tu i taua puaa hitu afii nei e, o te hau Roma ia; o ta matou ia e faaite nei. Aita râ matou i faaite e, o te anete-Kirito taua puaa e hitu afii ra.

—TOAE A MAIRE.

Te Mau Parau Api.

U A papaihia, te vai ra te hoê taata i Beritane, o tei ite i te re'o urî taata, e e tia ia'na ia paraparau i te hoê urî taata.

I taua ati rahi o te pahi ra o Tetania, mai tei faaitehia i te vea no Tiunu, ua moe roa e 3,423 pute no te mau leta. Tei roto i te pute hoê e 8,000 leta, no reira ua milioni te mau leta i moe.

E hitu matahiti a'enei ua moe i te hoê vahine to'na na tapea tari'a dai-moni e ua parihia to'na vahine tavani i te eiâ. I teie nei avae ua faaapîhia te tahua o to'na fare e ua itea-faahou-hia taua na tapea ra i te hoê ofaraa iore.

Ua rave te hoê tamaiti i te hoê pupuhi maitai, mai te tahi mau pupuhi maitai i iteahia i Tahiti nei te huru, e ua faatano hauti noa oia i taua pupuhi i to'na teina mai te mana'o ore i te ofai i roto ra. Te hopea, ua haamatapohia to'na teina iti.

Ua haere te hoê potii mai Wyoming, te hoê ia mataienaa i te tooa o te râ i Amerika, e tae roa i tahatai i te hitia o te râ i Amerika. E 10,000 maile te roa o to'na haereraa: na nia oia i te hoê puaahorofenua i te haere, e ua pau e piti matahiti.

Ua haapae te hoê taata poria roa i te maa e 20 a'e mahana. Aore roa taua taata ra i amu i te hoê maa iti i taua mau mahana ra, e e pape ana'e ta'na i inu. Ua na reira oia ia faanainaihia oia. Ua manuïa rii taua ravea ra, e ua mairi to'na faito e 8 kilo.

Ua oti i te hamanihia e te hoê taata Purutia te hoê fare mori. Tera te mea maere no taua fare ra, oia hoi na te mahana, a hiti mai ai oia ra, e tinai i taua mori; e ia mairi i raro te mahana e tutuihia'i taua mori ra. Na roto i te uira e te mau hihi mahana i oti ai taua ohipa ra.

I Baker City, i Amerika, ua pararî a'enei te hoê ata ûa e ua pohe roa te hoê vahine e ta'na tau tamarî tootoru. Ua painu atu to ratou fare, e ua moe roa'tu. Aita hoi i itea-faahou-hia te mau tino pohe o taua mau taata ra. Ua ino roa te mau faaapû i taua paeau fenua i te mau vaipue i teie nei matahiti.

I te 13 no Atete, a tere atu ai te hoê pahi auahi, mai Amerika atu i Beritane, ua û taua pahi ra i nia i te miti toetoe paari e ua ino atura. I te pô te ûraa e ua faaitoitoe te taata parau niuniu na te reva i ta'na ohipa e ua pahono maira e piti pahi e ua tere oioi taua na pahi i te tauturu i te pahi i putahia. I te poipoi roa ua tae atu ai taua na pahi, ei reira ua iteahia, aita i rahi te ino no taua pahi i puta e ua iti te riu, e no reira ua haere noa taua mau pahi i to ratou mau tere. Te i'oa no taua pahi o Corsican, e e 200 e tiahapa horopatete i nia iho ia'na. E mea faufaa rahi e te maere te parau niuniu na te reva.

I Farani ua ou'a te hoê puaahorofenua e 7 avae e 6 initi te teitei. No Ausarelia taua puaahorofenua. Te hoê ia arearea te reira no te papaa, oia hoi te faatiti aua ou'a teitei na te puaahorofenua.

Ua haruru te matine nò te hoê manuâ no Farani i Toulon, o "Verite" te i'oa o taua pahi ra. Aore e taata i pohe, ua ou'a râ te tahi tau taata i te miti no te mâta'u rahi e ua faahapa-puai-hia ratou e te tomana.

Ua upootia to Farani i to ratou peapea i Morocco. Na te raatira o Gourand i faaaratai i to'na nuu, e 3,000 ratou, e tama'i atu i te enemi, o Rogui e to'na nuu, ua vîtaua taata ra. E aihuaraau peapea rahi taua fenua Morocco.

Ua pohe roa te Emepera no Iapone, e 60 to'na matahiti a pohe ai oia ra. E 45 matahiti ta'na faatereraa i te ohipa a te Hau Iapone, oia hoi mai te taime mai e 15 o'na matahiti. E taata herehia e to'na mau taata, e ua parauhia oia te "Tamaiti no te Ao".

I te avae Atete, ua tupu te hoê vero rahi i te mataeinaa, no reira mai Viliamu Setemila, e ua anapa maira te uira, e ua ô i roto i te hoê aua niuniu. Tei roto i taua aua te tahi mau puaatoro, e ua faatiaia e hitu o taua mau puaatoro i taua aua niuniu ra i te taime i anapa mai ai te uira; ua pohe roa taua mau puaatoro. E mau puaatoro ufa ana'e ratou e te faufaa rahi.

I te 16 no Atetef ua tupu te hoê mea huru ê roa i Niu Ioka. Ua ou'a te hoê taata Italia na nia mai te hoê pereoo uira, e ua hape to'na ou'araa e ua mairi oia i raro i te pereoo ra, e ua tapû ê atu to'na upoo; pohe roa atura: faaea ihora te pereoo, e ua pou i raro e 1200 taata Italia no nia mai i te pereoo e ua tuturi ratou i pihaiiho i taua tino pohe mai te pure i to'na varua, ia ore oia e aufau i te moni no te pereoo, te tumu i ou'a'i taua taata.

I te vea no te avae ra Atete, ua faaitchia te huru no te putuputuraa rahi i Suiti o te feia puai i te ou'a, e te au, e te horo, etc. I te hopea o taua putuputuraa ra ua iteahia tei to Amerika te pae rahi roa no te mau rê, e 128 rê i roaa i to Amerika. Ua roaa i to Suiti 104 o te mau rê; e ua roaa i to Finland e 46 o te mau rê, e ua roaa i to Purutia, e 36 o te mau rê, e i to Farani e 23 rê. Tera mai te mea maere rahi no taua ohipa ra, oia hoi ua iteahia, o te hoê Initia, oia hoi te hoê taata maohi no Amerika, o oia te taata puai e te vitiviti o te mau taata i tairuruhia i reira no taua ohipa. O Iakobo Thorpe to'na i'oa, e ua riro te rê matamua ia'na.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.